



Preventiv 2021 - 2. lectüra

In üna seguonda lectüra ha la suprastanza cumünala trattà detagliadamaing ils preventivs dal quint da success e dal quint d'investiziuns 2021 sco eir il plan da finanzas ed il plan d'investiziuns per 5 ons dal 2022 fin 2026.

Orientaziun da l'Uffizi da construcziun bassa - sviamaint Susch

La suprastanza cumünala ha surgni ün'orientaziun da l'Uffizi da construcziun bassa chantunal sur dal stadi da proget dal sviamaint a Susch. Id es gnü declerà las consequenzas da la decisiun dal Tribunal federal d'october 2019 i'l cas „Schmitten“, chi varà consequenzas sün similis cas futurs in chantun Grischun, ed ils prossems pass per la cuntinuaziun dal proget.

Dumonda da credit supplementar - sanaziun sarinera Brail 2019

Id es gnü concess a la radunanza cumünala dals 31-08-2015 il credit per las lavurs a regard il proget sarinera nouva a Brail. La suprastanza es gnüda infuormada davart il surpassamaint da cuosts per quist proget. Il fat cha d'ürant la fabrica as ha stuvü refar eir la part sura da la via d'access fin sü pro la Via Chantunala, es gnü integrà quista part eir aint il proget da la nouva sarinera. La suprastanza conceda la dumonda dal credit supplementar, chi ha da gnir preschantada ad üna prosma radunanza cumünala.

EW Zernez - fibr'optica Brail - decisiun da princip sur dal proceder cul provedimaint grob e fin illa fracziun da Brail

Abitants e possessurs d'immobiglias a Brail varan a partir da l'on 2021 medemmas cundiziuns da forz'electricica sco quels illa fracziun da Zernez ed uschè eir la pussibilità d'ün attach da fibr'optica. Illa radunanza cumünala dals 12-12-2017 sun gnüts concess credits per fabricar sü la rait da fibr'optica illa fracziun da Zernez. Culs credits approvats oriundamaing per las investiziuns illa fracziun da Zernez as po implü proseguir cun las investiziuns las plü importantas i'l provedimaint grob fin illa fracziun da Brail e realisar prüms attachs individuals. L'agir es gnü approvà.

Radunanza cumünala - tractandas provisoricas dals 26 november 2020

La glista da tractandas provisorica da la radunanza cumünala dals 26 november 2020 es gnüda approvada. A quista radunanza vain preschantà principalmaing il preventiv 2021.